

Qamutit motorillit akileraarutaat pillugit Inatsisartut inatsisaata allanngortinnissaa, imaalillugu ATV-it taakkunungalu assingusut qamutit motorillit nunakkoorutit mikinerit sisamanik amerlanernilluunniit assakaasullit ukiumut akileraarutaat 2.000 kronemut appartinnissaanik Naalakkersuisut peqquneqarnissaannik Inatsisartut aalajangiiffigissaattut siunnersuut. (UKA 2019/135)
(Inatsisartunut Ilaasortaq Stine Egede, Inuit Ataqatigiit)

Uunga siunnersuut: Eqqusuinermi akitsuutit pillugit Inatsisartut inatsisaata allanngortinneqarneranik Inatsisartut inatsisaat nr. xx, xx. xxx 2019-imeersoq (Plug-in hybridbiilit akitsuutaat, biilinit innaallagissamik imaluunniit brintimik ingerlatilinnut akitsuummik akiliisussaanninneq kiisalu qamutit motorillit nunaannakkoorutit minnerusut akitsuutaannik atorunnaarsitsineq) (UKA 2019/165)
(Partii Naleqqap Inatsisartunut ilaasortaataitai)

Uunga siunnersuut: Qamutit motorillit akileraarutaat pillugit Inatsisartut inatsisaata allanngortinneqarneranik Inatsisartut inatsisaat nr. xx, xx. xxx 2019-imeersoq. (Qamutitut motorilinnut taamaallaat innaallagissamik brintimilluunniit ingerlatilinnut plugin hybridbiilinullu akitsuut, qamutitut motorilinnut nunakkoorutitut mikinerit akitsuuteqartitsinnginneq kiisalu akiliinissamut piffissaliussamik allannguinneq) (UKA 2019/166)
(Partii Naleqqap Inatsisartunut ilaasortaataitai)

Akissuteqaat

(Aningaasaqarnermut Nunanilu Avannarlerni suleqatigiinnermut Naalakkersuisoq)

Siullermeerinninneq

Aallaqqaasiullugu Naalakkersuisut Inatsisartunut ilaasortaq Stine Egede kiisalu Partii Naleqqap Inatsisartunut ilaasortaataitai aalajangiiffissatut siunnersuummik inatsisissatullu siunnersuutinik ukuninnga saqqummiussinerannik qutsavigiumavaat.

Inatsisartunut ilaasortaq Stine Egedep ATV-nut taakkulu assigisaat qamutit motorillit nunaannakkoorutit minnerusut sisamanik amerlanerusunilluunniit assakaasullit ukiumoortumik qamutitut motorilinnut akitsuutaasa 2.000 kr.-nut appartinneqarnissaa pillugu aalajangiiffigissatut siunnersuummik saqqummiussivoq.

Partii Naleqqap Inatsisartunut ilaasortaataitai inatsisissatut siunnersuutinik marlunnik, taamanikkut Naalakkersuisusut 2018-imi ukiaanerani ataatsimiinnermi immikkoortutut 197 aamma 198-itut inatsisissatut siunnersuutaannut amerlasuutigut assigiissuteqartunik saqqummiussipput. Inatsisissatut siunnersuutit ilaatigut qamutit motorillit minnerusut nunaannakkoorutit eqqusuinermi qamutillu motorilinnut akitsuutaasa atorunnaarsinneqarnissaannik siunnersuutinik imaqarput.

Qamutini motorilinni teknikkkut ineriartornerup inatsisit allanngortinneqarnissaannik pisariaqartitsinermik malitseqarnera Naalakkersuisut isumaqatigaat. Ukiuni kingullerni qamutitut motorilinnut, tassani ATV-t assigisaallu ilanngullugit, akitsuutaasa allanngortinneqarnissaannut siunnersuutinik assigiinngitsunik suliaqartoqartarpoq. Tamatuma saniatigut qamutitut motorilinnut innaallagissamik ingerlateqartunut ikaarsaarnermi,

qamutininut mootorilinnut avatangiisinut qajassuarnerusunut ikaarsaarneq oqilisaaviginiarlugu, appasinnerusumik akitsuusiisinnaaneq Naalakkersuisut paasisinnaalluarpaat. Aappaatigulli aamma aningaasanut inatsisip oqimaaqatigiissinneqarnissaa naapertuuttumik isiginiarneqartariaqarpoq.

Qamutininut mootorilinnut akitsuutit allanngortinneqarnerat pillugu inatsisissatut siunnersuut qamutit mootorillit oqimaassusaannik aallaaveqarpoq. Tamanna qamutininut mootorilinnut innaallagissamik ingerlateqartunut kiisalu plug-in hybridbiilinnut aamma atuuppoq. Naalakkersuisulli qamutit mootorillit innaallagissamik ingerlateqartut kiisalu plug-in hybridbiilit batteriiniq ingerlateqartut orsussamik atuisunut sanilliullutik oqimaannerunerisa nassatarisaanik aaqqiinerup taassuma naapertuuttuunera qularaat. Kalaallit Nunaanni qamutit mootorillit innaallagissamik ingerlateqartut plug-in hybridbiilillu nalinginnaanerpaat misissornerisa, taakku qamutininut mootorilinnut orsussamik imerpalasumik ingerlateqartunut sanilliullutik agguaqatigiissillugu 15-20 procentimik oqimaannerusarnerat takutippaa. Oqimaassutsit nikinganerat qamutini mootorilinni oqinnerusuni, oqimaannerusunut sanilliullugu annertuneruvoq. Qamutilluunniit mootorillit innaallagissamik ingerlateqartut akitsuutaat 50 procentimik apparneqaralarpat, qamutip mootorillit innaallagissamik ingerlateqartup oqitsup akitsuutaa qamutitulli mootorilittut orsussamik imerpalasumik ingerlatillitulli annertutigissaaq. Allatut oqaatigalugu oqimaassutsimik aallaaveqartumik akitsuusersueriaaseq qamutininut mootorilinnut avatangiisinut qajassuarnerusunut ikaarsaarnermut iluaqutsiinngissaanut aarlerinaateqarpoq.

Worldwide Harmonised Light Vehicle Test Procedure (WLTP) nutaaq EU-mi tamakkiisumik 2020-mi atorneqalernissaa naatsorsuutaavoq. Misissueriaaseq qamutit mootorillit qanoq ungasitsigisumik liiterimut ingerlasarnerannut pitsaannerusumik eqqornerusumillu naliliisarnermik toqqammavissiisuullunilu qanoq annertutigisumik mingutsitsisarnerannik takutitsisuvoq. Siunissami qamutininut mootorilinnut akitsuutit nunat allat arlallit assigalugit misissuinermit tassanga aallaaveqartumik pisarnissaa Naalakkersuisut pissusissamisoorutut isigaat. Naallu qamutiniq mootorilinnik angisuunik pisariaqartitsigaluaanniluunniit malittarisassat qamutiniq mootorilinnik sapinngisamik minnerpaamik mingutsitsisunik pisinissamut pilerilersitsisarnissaat iluaqutaasussat ilagaat. Taamaammat siunissami qamutininut mootorilinnut akitsuutit orsussamik imerpalasumik atuinermik toqqammaveqarnissaannik nassataqartumik siunnersuummik Naalakkersuisut suliaqarput.

Immikkoortoq 166-imi inatsisissatut siunnersuummut nassuiaatini siunnersuutip kommuninut tusarniaassutigalugu nassiuqqarnissaa pisariaqanngitsoq Partii Naleraq naliliivoq, naak inatsisissatut siunnersuummi kommunit qamutit mootorillit isatigassatut kommunit eqqakkanut passussiviinut tunniussisarnissamik pilerinarnerulersitsiniarlutik qamutininut mootorilinnut aningaasatigut ajunngitsorsisitsisarnissamik kissaataat mininneqarsimagaluartoq. Taamaalillutillu inatsisissatut siunnersuutit marluk massakkutut iluseqartillutik tusarniaassutigineqarsimangillat. Tamatuma ilaatigut namminersorlutik inuussutissarsiortut isummaminnik saqqummiussinissamut periarfissaqarsimanginnerat aamma nassataraa. Siunnersuut 2018-meersoq ilaatigut plug-in hybridbiilit akitsuuserneqarnerat pillugu kiisalu innuttaasut illoqarfinni apummik aqqusinernilu pissutsinik ajornakusoornerusunut iluaqutsiinnginnera pillugu isornartorsiorneqarpoq.

Naalakkersuisut isumaat naapertorlugu inatsisissatut siunnersuutit tamarmik aalajangiiffigisassatullu siunnersuut tusarniaassutigineqartariaqarput, taamaalilluni allannguutissatut siunnersuummik saqqummiussisoqarnissaa tunngavissaqarnerasoq isummorsorfigineqarsinnaaqqullugu.

Naalakkersuisut matumani erseqqissaatigerusuppaat aalajangiinissamut siunnersuut, Inatsisartuni UPA2019-imi immikkoortoq 54-itut siullermeerneqarpoq. Immikkoortoq immikkoortut 54-itut ingerlanneqartumi aappassaaneerseqassaaq, ullormullu oqaluuserisassat malillugit tamanna 17. oktober 2019 pissalluni.

Immikkoortoq 54-ip qulequtaraa: Ulloq 1. juli 2020 aallarnerfigalugu ATV-nut qamuterallannullu eqquusernermut akitsuutip atorunnaarsinneqarnissaa pillugu Naalakkersuisut peqquneqarnissaannik Inatsisartunut aalajangiiffisassatut siunnersuut. Siunnersuut Inatsisartut Aningaasaqarnermut Akileraartarnermullu Ataatsimiititaliaanni suliarineqalereerpoq. Immikkoortoq 54-ip immikkoortut 135, 165 166-ilu assigalugit qamutit motoorillit akitsuuserneqartarnerannut attuumassuteqarmata, taamatut tusarniaanermi siunnersuutip taassuma aamma ilanngunneqarnissaa naapertuussorinarpoq.

Tamanna tunuliaqutaralugu siunnersuutit Aningaasaqarnermut Akileraartarnermullu Ataatsimiititaliamut innersuunneqarnissaat aammalu immikkoortunit 165-imik 166-imillu aappassaaneerinninnerit pingajussaaneerinninnerillu, kiisalu immikkoortoq 54-ip 135-llu aappassaaneerneqarnissaasa, attuumassuteqartunut tusarniaassutigineqarnissaat siunertaralugu 2020-mi upernaakkut ataatsimiinnissamut kinguartinneqarnissaat Naalakkersuisut kaammattuutigaat.